

SAMÞYKKT

um hundahald í Sveitarfélaginu Hornafirði.

1. gr.

Hundahald í Sveitarfélaginu Hornafirði, að undanteknu hundahaldi þarfahunda á lög-
býlum og hunda sem notaðir eru til leitar- og björgunarstarfa, svo og aðstoðarhunda blindra
og fatlaðra, sætir þeim takmörkunum sem getur í 3. gr. samþykktar þessarar. Samkvæmt
lögum um dýravernd nr. 15/1994 fer Umhverfisstofnun með mál er varða dýravernd.

2. gr.

Stjórnsýsla.

Bæjarstjóri í umboði bæjarstjórnar fer með umsýslu vegna samþykktar þessarar og getur
ráðið sérstaka dýraeftirlitsmenn eða falið starfsmönnum sveitarfélagsins hlutverk dýraeftirlits-
manns. Bæjarstjórn setur dýraeftirlitsmanni starfsreglur. Þeir starfa í umboði heilbrigðis-
nefndar Austurlands.

3. gr.

Takmarkanir á hundahaldi.

Bæjarstjórn er heimilt að veita lögráða einstaklingum leyfi til hundahalds, vegna hunda
annarra en þeirra sem undantekning 1. gr. samþykktar þessarar tekur til, með eftirfarandi
skilyrðum og gegn greiðslu leyfisgjalds. Leyfið er bundið við nafn og heimilisfang við-
komandi og er ekki framseljanlegt. Leyfið er einnig bundið við þann hund sem það er gefið
út fyrir. Tilkynna ber eigendaskipti og sækja um nýtt leyfi.

Sveitarstjórn skal halda skrá yfir hunda sem veitt er leyfi fyrir, þar sem fram koma upp-
lýsingar um hundinn og eiganda hans eða forráðamann. Skráin skal vera aðgengileg lögreglu,
heilbrigðiseftirliti og dýraeftirlitsmanni, sé hann starfandi.

Um hundahald í fjöleignarhúsum fer að 13. t. A-liðar 41. gr. laga nr. 26/1994 um fjöl-
eignarhús. Við skráningu hunds skal leggja fram skriflega staðfestingu allra umráðamanna
íbúða hússins á samþykki þeirra, auk eiganda viðkomandi húsnaðis, sé um leiguhúsnaði að
ræða. Þegar hús skiptist í aðgreinda hluta nægir samþykki þeirra eigenda sem hafa sameigin-
legan inngang, stigagang eða annað sameiginlegt húsrými. Óheimilt er að halda hunda í
fjöleignarhúsum ef hundur sannanlega veldur eða viðheldur sjúkdómum hjá íbúum.

Hundur sem færður er til skráningar skal vera merktur með örmerki skv. reglugerð um
aðbúnað og umhirðu gæludýra og dýrahald í atvinnuskyni nr. 1077/2004. Eigandi hundsins
skal strax að lokinni örmerkingu koma upplýsingum um númer örmerkis og nafn og kennitölu
eiganda til sveitarstjórnar auk myndar.

Leyfisgjald vegna hundahalds skal greiða árlega til sveitarsjóðs, eftir gjaldskrá sem
sveitarstjórn setur að fenginni umsögn heilbrigðisnefndar Austurlands samkvæmt ákvæðum
25. gr. laga nr. 7/1998 um hollustuhætti og mengunarvarnir, með síðari breytingum. Gjaldið
skal ekki vera hærra en sem nemur rökstuddum kostnaði fyrir veitta þjónustu og eftirlit og
skal birt í B-deild Stjórnartíðinda. Í gjaldskrá er einnig heimilt að ákveða handsömunargjald.

Gjaldið skal greitt í fyrsta sinn við skráningu hundsins og síðan árlega fyrirfram, fyrir lok
febrúar ár hvert. Hafi gjaldið ekki verið greitt innan tveggja mánaða frá gjalddaga, er heimilt
að afturkalla leyfi til hundahalds.

Innifalið í skráningargjaldinu er ábyrgðartrygging og hreinsun og merkisþjald, eigandi
hunds ber annan kostnað svo sem af örmerkingu og hálsól o.þ.h.

Við greiðslu leyfisgjalds ber leyfishafa að framvísa vottorði dýralæknis um að hundurinn hafi verið ormahreinsaður á undangengnum 12 mánuðum. Heimilt er að afturkalla leyfi til hundahalds ef hundahreinsun er ekki framkvæmd.

Auk örmerkis skulu hundar bera hálsól með upplýsingum um heimilisfang eiganda og símanúmer.

Óheimilt er að láta hund dvelja lengur en 2 mánuði á heimili án þess að sótt sé um leyfi fyrir honum. Það fríar þó eiganda ekki ábyrgð á því tjóni sem hundurinn kann að valda meðan hann er óskráður. Ekki skal veita leyfi fyrir fleiri en tveim hundum á hverju heimili. Ef sérstakar ástæður mæla fyrir um getur bæjarstjórn veitt tímabundna undanþágu frá þessu ákvæði.

Hundar skulu aldrei ganga lausir á almannafæri. Utandyra skulu hundar ávallt vera í taumi í fylgd með aðila, sem hefur fullt vald yfir þeim. Þegar hundur er í festi á húslóð, skal lengd festarinnar við það miðuð að óhindrað megi ganga að aðaldyrum hússins.

Hundaeigendum ber að hlíta að öðru leyti lögum og reglum, er hundahald varðar, þ. á m. reglum um árlega hreinsun hunda og greiðslu leyfisgjalds, sbr. ákvæði b-liðar þessarar greinar, svo og fyrirmælum sem heilbrigðisnefnd setur.

Bændum á lögbýlum er heimilt að hafa þarfahunda án greiðslu leyfisgjalds en ber þó að skrá, ábyrgðartryggja, örmerkja og hreinsa þá á eigin kostnað. Hundar á lögbýlum mega ganga frjálssir á landareign eigenda sinna. Að öðru leyti skulu slíkir hundar háðir ákvæðum þessarar samþykktar. Skyld er bændum á lögbýlum og eigendum hunda sem nefndir eru í 1. gr. hér að framan að sjá til þess að hundar þeirra séu ekki lausir á almannafæri innan þéttbýlis.

4. gr.

Óheimilir staðir.

Eigi er leyfilegt að hafa með sér hunda, þó í taumi séu, inn í opinberar stofnanir, skólahús, matvöruverslanir eða aðra þá staði sem um ræðir skv. ákvæðum 19. gr. reglugerðar 941/2002. Slíkir staðir eru m.a. eftirfarandi skv. ákvæðum í fylgiskjali 3 með reglugerð um hollustuhætti nr. 941/2002:

Heilbrigðis- og meðferðarstofnanir.

Skólar.

Lækna- og tannlæknastofur.

Sjúkrahús og aðgerðarstofur.

Vistarverur handtekinna manna.

Heilsuræktarstöðvar.

Íþróttastöðvar og íþróttahús.

Gæsluvellir.

Snyrtistofur.

Nuddstofur og sjúkraþjálfun.

Sólbaðsstofur.

Húðflúrstofur.

Samkomuhús, s.s. kirkjur, leikhús, hljómléikasalir, söfn og kvikmyndahús.

Gististaðir.

Veitingastaðir.

Sumarbúðir fyrir börn.

Um matvælaþyrirtæki fer samkvæmt ákvæðum reglugerðar um matvælaeftirlit og hollustuhætti við framleiðslu og dreifingu matvæla.

Heimilt er þó að fara með gæludýr inn í íþróttamannvirki, heilbrigðisstofnanir, snyrtistofur og aðra starfsemi sem sérstaklega eru ætluð dýrum.

5. gr.

Ónæði og óþrif af völdum hunda.

Eigendum hunda ber að sjá svo um að dýrið valdi ekki hávaða, ónæði, óþrifnaði né óhollustu.

Eigendum eða forráðamönnum hunda er skylt að sjá til þess að saur eftir hundinn sé fjarlægður á tryggilegan hátt.

Ef hundur veldur nágrönnum eða öðrum ítrekuðu ónæði, óþrifum eða tjóni, þá ber eiganda eða forráðamanni að koma í veg fyrir slíkt.

6. gr.

Handsömun hunda.

Hundar sem fangaðir eru skal færa í sérstaka hundageymslu, sem hefur leyfi heilbrigðis-
eftirlits skv. hollustuháttareglugerð nr. 941/2002 og Umhverfisstofnunar.

Hundar, sem ganga lausir utan húss í þéttbýli, skal handsama og færa til hundageymslu.

Sé ekki unnt að greina hver eigandinn er, með örmerki eða öðru skýru auðkenni, skal auglýsa eftir eiganda. Gefi eigandi sig ekki fram innan 5 sólarhringa frá birtingu auglýsingar er lögreglu eða dýraeftirlitsmanni heimilt að láta lóga viðkomandi hundi án frekari fyrirvara.

Sé hundur merktur skal tilkynna eiganda ástæðu handsömunarinnar. Dýraeftirlitsmaður heldur skriflega skýrslu um ástæðu föngunarinnar og ber eiganda að kvitta á sömu skýrslu þegar hundurinn er sóttur til dýraeftirlitsmanns. Ef eigandi hunds vitjar hans ekki innan 7 sólarhringa og gengst ekki við broti á samþykkt þessari, sé um slíkt að ræða, hefur lögregla eða dýraeftirlitsmaður, heimild til að láta lóga hundinum að þeim tíma liðnum.

Eigandi hunds sem fluttur er í hundageymslu skal greiða handsömunar-, fóður- og vistunargjald skv. gjaldskrá um hundahald í viðkomandi sveitarfélagi áður en honum er afhentur hundurinn á ný. Sé hundur ekki örmerktur skal eigandi hans greiða fyrir örmerkingu og skráningu hundsins áður en hann er afhentur og fær gegn því beiðni sem nýta má hjá dýralækni til greiðslu fyrir örmerkingu.

Hunda, sem ráðast á menn eða skepnur, skal fjarlægja og lóga tafarlaust í samráði við dýralækni.

7. gr.

Eftirlit og refsiviðurlög

Lögregla og dýraeftirlitsmenn í umboði heilbrigðisnefndar hafa eftirlit með hundum samkvæmt samþykkt þessari og skulu þessir aðilar tilkynna sveitarfélaginu um kærur sem þeim berast vegna meintra brota á samþykktinni.

Með brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir með síðari breytingum.

Við minniháttar brot á samþykkt þessari skal eigandi hundsins sæta skriflegri áminningu. Endurtekin eða alvarleg brot geta leitt til leyfissviptingar.

Leyfishafa er skylt að greiða kostnað sem leiðir af brotum á samþykkt þessari.

8. gr.

Sveitarstjórn er heimilt hvenær sem er að afturkalla leyfi fyrir einstökum hundum eða öll veitt leyfi, telji hún þess þörf. Um slíkar ákvarðanir skal gætt ákvæða stjórnisýslulaga.

9. gr.

Gildistaka.

Samþykkt þessi staðfestist hér með samkvæmt ákvæðum 25. gr. laga nr. 7/1998 um hollustuhætti og mengunarvarnir með síðari breytingum og öðlast gildi við birtingu. Frá sama tíma fellur úr gildi samþykkt nr. 382/1995 um hundahald á Hornafirði.

Ákvæði til bráðabirgða.

Þeir sem halda hunda við gildistöku samþykktarinnar, en hafa ekki skráð þá, skulu færa þá til skráningar samkvæmt samþykkt þessari fyrir 1. janúar 2008.

Umhverfisstjórnuneytinu, 11. júní 2007.

F. h. r.

Ingimar Sigurðsson.

Sigurbjörg Sæmundsdóttir.

B-deild – Útgáfud.: 27. júní 2007